



SULTAN Nazrin mencemar duli beramah mesra dengan sebahagian pegawai tadbir diplomatik yang mengikuti kursus diploma diplomatik di IDFR.

'Orde mesti letakkan kebajikan manusia'

Kuala Lumpur: Sultan Perak Sultan Nazrin Muizzuddin Shah mencadangkan agar dasar dan diplomasi luar negara Malaysia berusaha mendapatkan orde serantau dan dunia yang lebih baik.

Menurut baginda, hal itu boleh dilakukan bersama rakan dan negara jiran seperti negara ASEAN. "Pada pandangan beta, orde ini mestilah

meletakkan kebajikan manusia, bukan negara. Negara adalah kenderaan dan alat untuk tujuan itu.

"Ia mesti berdasarkan kepada keamanan, kemakmuran dan keadilan untuk semua mengikut undang-undang antarabangsa yang boleh dikuatkuasakan," titah baginda pada Majlis Titah Amanat 2017 bertajuk Diplomasi Abad ke-21 di Institut Diplomasi dan

Hubungan Luar Negeri (IDFR), semalam.

Hadir sama, Menteri Besar Perak Datuk Seri Dr Zambry Abd Kadir, Ketua Setiausaha Kementerian Luar Datuk Ramlan Ibrahim dan Ketua Pengarah IDFR Datuk Mohamad Sadik Kethergany.

Sultan Nazrin yang juga Penaung Diraja IDFR bertitah, orde itu mestilah memerangi peperangan

dan ancaman perang dengan berkesan melainkan nyata untuk tujuan pertahanan.

Menurut baginda, ia juga mesti didasarkan kepada prinsip keselamatan bersama dan berusaha menghormati dan menguat kuasa peruntukan undang-undang kemanusiaan antarabangsa bagi melindungi penduduk awam yang tidak bersalah.